


Fasnacht 2006



VERSCHNUUFFER

S isch zem Schreye mit der Freye

S isch zem Schreye mit der Freye!
Doch eerlig: s isch zem Duuregheie!
Was aige gsi isch, glunge, glatt,
verzieht sich us der Innerstadt.

Nur Dotzedwaaregschäfte blyybe,
well nur DIE schwarzi Zahle schryybe
au d Miete als wie heecher stygge
und s Bsundere eso vertryybe!

Wär bhauptet, das syg alles glooge,
däm stell ych doo - grad e baar Frooge:
Wenn bisch zem letschte Mool in d Stadt
go Shoppe und hesch gsait s isch glatt?

Wenn bisch äggscht kirzlig in der Freye
go bummle ooni naime z gheie?
Und wenn bisch in e Laade ko,
wo ai Joor speeter isch no doo?

S isch Basel-Stadt schwäär moribund
scho glyy schloot doo die letschti Stund.
Der Sänsemaa duet d Sänse schlyffe,
De gspyyrsch e Morgewind, e styffe...

Denn glyych, wie d Veegel uf em Flug
butzt s z Basel Gschäfte, Zug um Zug.
Doch ka me laider nyt als schimpfe,
well geege s Virus nid kasch impfe.

Als Burger findsch es aifach schaad,
als Touri isch s nid bsunders "glaad",
Verzwyfflig spyysch als junge Burscht
und dr Regierig - isch es Wurscht!

Die het vom Thema "Städteplanig"
bakanterwyys au gar kai Aanig:
Zem Stichwort "Parggblätz und Belaag"
kunnt numme hoole Misch an Daag!

Solang dr Rubel rollt isch glar,
laufft s fir die Gnuschti wunderbar.
Sich vo dr Masse z differiere,
das miesst me aigetlig brobiere!



Die groosse Städt - es isch der Hoon -
erschyyne alli monoton:
Eb Burberry, eb LVH
in jeder Stadt kasch s Glyyche ha.



Die Hochglanzlääde sin zwar scheen,
doch schaffe sii ys vyl Problem:
S nimmt d Laadeflächi zwar guet zue,
nur bruucht s kai Personal derzue.



Zem nääbe groosse Metropole
im Stand sy au Lorbeere z hole,
muesch ganz e llychtig Image biete,
sunscht blybt nur d Liga vo de Niete.



S isch scheen hän mir jetzt au e Zara
e Benetton und e Max Mara.
Der Füglistaller het s verschrumpft,
s git ney der Esprit, wo dert trumpft.



Doch wär ersetzt is äggscht der Knopf,
der Franz Carl Wäber fir e Gnopf?
Der Wullehof isch au ewäg
und niene griegsch mee feyn Gebägg.



Denn au der Pellmont het s verboose
dert kaufsch Dir ney Dy Lacoste Hoose.
Als ainzig Abgang nid z beduure,
isch dä vom Schlisselwirt, däm suure!



Au partymässig isch nyt loos,
am Oobe in der Freye Strooss.
S git s Sixty-Six und in der Noot
au s Bunny-House, der räscht isch doot!



S wär digg, wär an der Freye Strooss
gar rund um d Uhr e Hufe loos!
So dass dy jeede Daag ufs Neue
an ihrer Existänz kasch freue!



Kenntsch shoppe, fitte, lädele,
au shake, showe, bädele,
De kenntsch au numme ain go nää,
das wurd der Freye Uffdriib gää!



So mien mir is halt zerscht no sueche
im graue Einheitsgschäftekueche.
Und mechtsch glyych ebbis Bsunders ha,
no muesch halt gschwind - na Züri ga!



Ziri het zwar naime duure
Au nyt - nur e grossi Schnuure! (Anm. der Redaktion)

www.verschnuuffer.ch

*D Ladäarnenuustellig isch wie allewyyl uff em
Minschterplatz, vom Mändig znacht (8. Meerz)
bis am Mittwucho demoorge (10. Meerz).
Deert ka men au alli Zeedel und Schnitzelbängg,
d Blaggedde und der Rädabängg kaufe.
Glyychzytig isch in der Kasäärne d Wäage-
und Reggwisyte-Uusstellig.
Mer fraien sy uff Ihre Bsuech.*